

Kunngjering

Forskrift om nye vedtekter for gravplassane i Vik kommune.

Forvaltning av gravplassane i Vik kommune er Vik kyrkjelege fellesråd sitt ansvar; fellesrådet er difor gravplassmyndigheita i kommunen. Me har sju gravplassar å halde i hevd og der det kan vera gravlegging; Fresvik, Feios nye og gamle gravplass, Vangsnes, Vik, Hopperstad og Arnafjord.

Forvaltning av ein gravplass er regulert i lover og forskrifter (Gravplasslova av 7. juni 1996 og gravplassforskrifta av 10.januar 1997). No har Vik kyrkjeleg fellesråd vedteke, og fått godkjent av Statsforvaltaren eigen forskrift som er å sjå på som lokale vedtekter. Vedtektene er i stor grad presisering av tidlegare vedtekter og god praksis.

Det er særskilt to høve som er viktig å merka seg i den nye forskrifta. Det eine er reglane rundt det å feste ei grav. Ved gravlegging, kan ein reservere ei grav ved sida av. Ein gjer då ein avtale om feste som er den einaste måten å reservere grav på. Den gravlagde har rett på fri grav i 30 år, og etter det kan pårørande feste grava ytterlegare i 30 år. Vil ein feste utover dette, må det søkjast om særskilt. Vik kyrkjeleg fellesråd arbeider no med å oppdatere karta på alle gravplassane våre. Me arbeider også med å få oversikt over alle som festar graver i dag og ynskjer å feste vidare. I den nye forskrifta kan ein feste ei grav for 5 år om gongen (tidlegare 10 år). Festeavgifta er på kr 300 per år (vedteke i kommunestyret i 2021). I tråd med nye vedtekter , og dei opplysningar me har om festarar i dag, vil me den næraste tida sende ut tilbod om vidare feste frå 2022.

I den nye forskrifta er det også viktig å merke seg ansvarstilhøve mellom gravplassmyndigheita og festar, altså den som disponerer og rår over ein gravstad. Festar av ei grav/ ein gravstad er ansvarleg for pynting innanfor gitte rammer og for gravminnet og vedlikehald av dette. Gravplassmyndigheita er ansvarleg for alt utanom den einskilde grava. Det er viktig med godt samarbeid mellom oss for at gravplassen er ein verdig stad der me kan minnast våre kjære. Vik kyrkjeleg fellesråd ynskjer å leggja til rette for fin klypping av plen, god avfallshandtering, gode rutinar ved gravlegging og leggja til rette for vanleg stell av gravene.

Me ser det kan vera ei utfordring å sikre god avfallssortering. Det er viktig å merke seg at det er kun avfall som kan brytast ned til jord som skal kastast i kompostbingen (til dømes mange kransar inneheld eller er surra med plasttråd). Me ser også at det er kome nye typar lykter og dekor som inneheld batteri og elektronikk. Ansvarlege for grava må ta slikt avfall med seg heim og levera på eigna stad.

Det kan også vere vanskeleg å redusere plantinga til oppmåla område. I nye vedtekter står det:
Framfor gravminnet er det høve til å opparbeide eit plantefelt i høgd med bakken rundt. Det må ikkje vere breiare enn breidda på gravminnet, men kan i alle høve vere opp til 60 cm. breitt. Det kan ikkje stikke lenger fram enn 60 cm, målt frå bakkant av gravminnet. Det kan ikkje plantast vokstrar som er høgare enn gravminnet eller går ut over plantefeltet. Ved eventuell innramming av plantefelt skal overkant på innramminga, uansett materiale, flukta med bakkenivå.

Vik kyrkjeleg fellesråd 15.6.22

Marit J Andersen, kyrkjeverje